

NJUOLGGADUSAT

Sámi Dáiddáriid ja Girječálliid Buhtadusfoanda

§ 1

Foanda namma lea Sámi Dáiddáriid ja Girječálliid Buhtadusfoanda - SDGB.

§ 2

Sámi dáiddáriin ja girječálliin oavvilduvvvo sii guđet devdet miellahttogáibádusaid sámi govvadáiddár-, dáiddaduojár ja dáiddalaš govvideaddjiid – ja girječálliidservviide.

§ 3

Foanda lea háldenfoanda buhtadussii mii máksojuvvo oktasaš vuđuin sámi govvadáiddáriidda, dáiddaduojáriidda ja dáiddalaš govvideaddjiide ja girječálliide, čuovvovaš surggiin;

a. buhtadus geavahit sámi govvadáiddáriid, dáiddaduojáriid ja dáiddalaš govvideaddjiid ja girječálliid bargguid, lága mielde mii gusto fotokopieremii ja eará sullasaš bargguide, dahkkisuodjaluvvon dáiddabargguide oahpahasdoaimmas.

b. buhtadus geavahit sámi govvadáiddáriid, dáiddaduojáriid ja dáiddalaš govvideaddjiid ja girječálliid bargguid luoikkahan- ja geavahanávdnasiin almmolaš girjerádjosiin, maiddá dutkan- ja spesiálagirjerádjosiin,

c. eará buhtadusa geavahit ja buhttet lobihis geavaheami sámi govvadáiddáriid, dáiddaduojáriid ja dáiddalaš govvideaddjiid ja girječálliid bargguid ovddas almmolaš ja priváhta doaimmain,

d. buhtadusa čájehemi ovddas govvadáidaga/dáiddaduoji almmolaš oamastusas.

§ 4

Foanda ruhta galgá atnojuvvot čuovvovaš ulbmiliidda:

a. Máksit sámi govvadáiddáriidda, dáiddaduojáriidda ja dáiddalaš govvideaddjiide ja girječálliid bargostipeandda, mátkestipeandda, álggahanstipeandda, prošeaktastipeandda, ávnnastipeandda ja čájehusstipeandda.

b. Eará doaimmaide ovddidit sámi govvadáidaga ja girjjálašvuoda, dás maiddá doarjja doaimmahit SDS ja SGS.

§ 5

Foanda ruđa hálddaša 4-njeallje miellahttosas stivra oktan persovnnalaš várrelahtuiguin maid SDS ja SGS jahkečoahkkimat välljejit. Goabbáge searvi vällje 2-guokte stivralahtu oktan várrelahtuiguin. 2-guovttis foandastivrra áirasiin välljejuvvoa stivralahtuid ja várrelahtuid gaskkas, nubbi SDS:s ja nubbi fas SGS:s.

Stivralahtut ja várrelahtut välljejuvvojit 2 jagáš doaibmaáigái, iige oktage sáhte leat badjel 6 jagi oktalaččat. Doaibmaáigi lea vällgajagi suoidnemánu 1. b. rájes. Foandastivra vällje ieš jodiheaddji ja nubbijodiheaddji 2 jahkái ain hávil. Stivra lea mearridannávccalaš go uhcimustá 3-golbma miellahtu (dás maiddá várrelahtut) oktan jodiheaddjiin dahje nubbijodiheaddjiin leat sajis. Stivračoahkkimiidda gohčču jodiheaddji, dahje go uhcimustá 2-guokte stivralahtu dan gáibidit. Čoahkkingohččun

sáddejuvvo SDS:i ja SGS:i diehtun. Stivrra čoahkkimiin čállojuvvo beavdegirji. Čoahkkibeavdegirjii čálus sáddejuvvo SDS ja SGS stivrii.

Okta stivračoahkkinn galgá dollojuvvot mañimustá juovlamánu 15. b. foandda ruđa váldojuohkima áigumušain. Stipeandaruhta máksojuvvo juohke jagi ovdal ođđajagimánu 15. b. Stivrra jodiheaddji ja okta miellahttu čálliba vuollái foandda ovddas. Stivra sáhhtá addit prokura.

Foandastivra ráhkada láidagiid foandda ruđa hálddašeapmái ja juohkimii. Láidagat bohtet fápmui foandastivrra mearrádusa mañnil, muhto SDS ja SGS jahkečoahkkimat mearridit daid loahpalaččat.

Stivralahtut ja várrelahtut leat dain áigodahkii go leat válljejuvvon, ieža čuldojuvvon sáhhtit ohcat SDGB` stipeanddaid.

SDGB` stipeanddaid ohcanáigi lea golgotmánu 15. b.

§ 6

Foandastivra juohká foandaruđa foandda doaibmasuorggi iešguđet ulbmiliidda.

SDS ja SGS válljejit goabbáge 3-golbma miellahttosas stipeandalávdegotti oktan várrelahtuiguin main lea 2 jagáš doaibmaáigi. SGS ja SDS fágalávdegottit árvalit foandastivrii stipeandajuohkimiid stipeandaortnega láidagiid mielde.

§ 7

Foanda lea rehketoallogeatnegas. Rehketoallu ja jahkediđáhus galget juohke jagi sáddejuvvot SDS ja SGS ja Kulturdepartementii, mañnil go searvvit leat jahkečoahkkimiiddiset doallan. Departemeanttas lea vuoigatvuohta geahččat foandda čálašeami ja rehketoalu.

§ 8

SDS ja SGS jahkečoahkkimat mearridit foandda njuolggadusaid. Dáid galgá dohkkehit Kulturdepartemeanta.

Juolgenotat:

Njuolggadusevttohusaid dohkkehan SDS, SG, SAMUS, STS jahkečoahkkimat borgemánus 1990.

Loahpalaš njuolggadusaid gárvvistan SDGB` stivra 1990:s.

Kulturdepartemeanta dohkkehan golgotmánu 3. b. 1990.

Nuppástuhttin SDS ja SGS 1997 ja 1998 jahkečoahkkimiin.

Kulturdepartemeanta dohkkehan 21.10.1998 ja 11.09.2002.

Ođastuvvon 23.10.1998 ja 20.09.2002.

Nuppástuhttin SDS ja SGS 2004 ja 2007 jahkečoahkkimiin.

Kulturdepartemeanta dohkkehan 06.09.2010.

Nuppástuhttin SDS jahkečoahkkimis 2019.